

Siunissami aalisarsinnaanermut akuersissutip aqutsisoqarfimmi ataasiinnarmi atornerqartalernissaa - taamatullu aqutsisoqarfiup "Kalaallit Nunaata sinnerata" siunissami aqutsivinnut immikkoortunut arfinilinnut aggornilersorneqarnissaa (Maniitsoq, Paa-miut, Qaanaaq, Sisimiut, Kalaallit Nunaata kujataa aamma Tasiilaq) anguniarlugu sinerissamut qanittumi qaleralinniarneq pillugu nalunaarut allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Michael Rosing, Attaviitsoq)

Akissuteqaat

(Aalisarnermut Piniarnermullu Naalakkersuisoq)

2. Aappassaaneerneqarnera

Naalakkersuisut siunnersuummut Inatsisartunut ilaasortamit Michael Rosingimit, Attaviitsoq, saqqummiunneqartumut qujaniarput. Naalakkersuisut Aalisarnermut, Piniarnermut Nunalerinermullu ataatsimiititaliaq qutsavigerusuppaat, ataatsimiititaliap aappassaaneerlugu oqaluuserineqannginnerani peqqissaartumik sulisimaneranut. Aalisarnermut, Piniarnermut Nunalerinermullu ataatsimiititaliap aappassaaneerlugu oqaluuserineqarnissaata isumaliutissiisutaa Naalakkersuisut soqutiginarilluinnarlugu atuarsimavaat.

Naalakkersuisut ajuusaarutigaa Aalisarnermut, Piniarnermut Nunalerinermullu ataatsimiititaliap apeqqutaanut kingusinaartumik akissuteqarmata, Naalakkersuisullu paasisinnaalluinnarpaat ataatsimiititaliaq isornartorsiuimmat.

Naalakkersuisut siulittaasuata ammaalluni oqalugiaataanut ataatsimiititaliap uparuaassutaanut tunngatillugu Naalakkersuisut suli kissaatigivaat sinerissap qanittuani qaleralinniarnepun aqunneqarneranut allannguiniarlutik ingerlatsinissaq. Siunnersuut siullermeerlugu oqaluuserineqarmat Naalakkersuisut sinerissap qanittuani qaleralinniarnermi allannguutissatut kisaatitik saqqummiuppaat. Ileqqorissaarnerussaarluni allannguutigineqartussatut siunnersuutit naatsumik erseqqissaassutigeqqissallugit:

Naalakkersuisut kissaatigivaat Nuuk aqutsiveqarfeqalissasoq. Nuup aqutsiveqarfiulerneratigut Nuup eqqaani aalisarneq immikkut aqunneqarsinnaalissaaq, taamaaliornikkullu najukkami tamaani sulisussaqaarniarneq eqqarsaatigalugu qalerallit tamaaniittut illersorneqarsinnaassamata. Aqutsiveqarfimmik Nuummi pilersitsinikkut Nuup aqutsiveqarfianut aalisarsinnaanermut akuersissutinik immikkut ittunik tunniussisalernissaq pisiaqalersussaavoq aqutsiveqarfimmi tassani qaleralinniarneq inuussutissarsiutigalugu ingerlanneqarsinnaassappat. Sinerissap qanittuani qaleralinniarneq pillugu Namminersorlutik Oqartussat nalunaarutissaattut siunnersuut naapertorlugu Nuup aqutsiveqarfiani qaleralinniarnissamut immikkut pisassiissuteqarnissaq aalajangersaaffigineqartussaavoq.

Naalakkersuisut kissaatigalugu oqaatigissavaat aqutsiveqarfinni pingasuusuni Upernavimmi, Ummannami Qeqertarsuullu Tunuani taakkunani ataasiakkaani pisassiissutinit annerpaamik 10 procentit tikillugit aalisartunit aqutsiveqarfinnit avataaneersunit pisarineqarsinnaasutut qummut killileerusukkamik. Sinerissap qanittuani qaleralinniarneq pillugu Nalunaarummi atuuttumi aqutsiveqarfinni pingasuusuni ataasiakkaani Upernavimmi, Ummannami Qeqertarsuullu Tunuani aalisarsinnaanermut akuersissuteqartut aqutsiveqarfiit iluini tamani aalisarsinnaatitaapput. Aqutsiveqarfiit ataasiakkaat iluini pisassiissutit aalajangiunneqartup 10 procentianik qummut killiliinikkut Upernavimmi, Ummannami Qeqertarsuullu Tunuani

akuersissuteqartunit siunissami aalisarsinnaalernissaannik Naalakkersuisut kissaateqarput. Tamatuma aqutsiveqarfiit ataasiakkaat iluini aalisarnerup illersorneqarsinnaanissaannik annertusaaqataassaaq.

Tamatuma saniatigut Naalakkersuisut allatut killiliissuteqarnissamik kissaateqarput, tassa aalisarsinnaanermik akuersissutaatillit pissassiissutinik pigisaqartut killeqarfiit pisassiiffiunngitsut iluini aalisartarnerini, suli pisassaartoqartillugu aalisarnerup ingerlanneqarpat piasarisat pisassarisanit ilanngaataasalernissaannik, aammalu aqutsiveqarfimmi aalisartut atassuteqaa-teqarfigisaanni taamaallaat killeqarfiit pisassiiffiunngitsut iluini pisinnaalissalluni. Tamatumunnga atatillugu Naalakkersuisut kissaateqarput sinerissap qanittuani qaleralinniarneq pillugu Nalunaarummi allassimasup tassalu, killeqarfiit pisassiiviunngitsut iluini aalisarsinnaanermut periarfissarititaasoq attatinnarneqarnissaa.

Saqqummiussakka tunngavigalugit ataatsimiititali allu isumaliuutissiissutaa innersuussutigalugu matumani siunnersuutigineqartoq innersuussutigissavara itigartinneqassasoq.